

四庫全書

史部

欽定四庫全書

唐律疏義卷二十九

唐 長孫無忌等 撰

斷獄上

凡一十四條

疏斷獄律之名起自於魏魏分里悝囚法而出此篇至北齊與捕律相合更名捕斷律至後周復為斷獄律釋名云獄者確也以實囚情臯陶造獄夏曰夏臺殷曰美里周曰圜土秦曰圜圖漢以來名獄然諸篇

罪名各有類例訊捨出入各立章程此篇錯綜一條流以為決斷之法故承衆篇之下

囚應禁而不禁

諸囚應禁而不禁應枷鎖杻而不枷鎖杻及脫去者杖罪笞三十徒罪以上遞加一等廻易所著各減一等

疏義曰獄官令禁囚死罪枷杻婦人及流以下去杻其杖罪散禁又條應議請減者犯流以上若除免官當並鎖禁即是犯笞者不合禁杖罪以上始合禁推

其有犯杖罪不禁應枷鎖杻而不加鎖杻及脫去者
缺

笞三十徒罪不禁及不加鎖若脫去者笞四十
流罪不禁及不加鎖若脫去者笞五十死罪不禁及
不加鎖若脫去者杖六十是名遞加一等迴易所
著者各減一等謂應枷而鎖應鎖而枷是名迴易所
著徒罪者笞三十流罪笞四十死罪笞五十

即囚自脫去及迴易所著者罪亦如之若不應禁而禁
及不應枷鎖杻而枷鎖杻者杖六十

疏義曰即囚自擅脫去枷鎖扭者徒罪笞四十流罪
以上遞加一等即囚自迴易所著者各減一等故云
亦如之若不應禁而禁及不應枷鎖扭而枷鎖扭並
謂據令不合者各杖六十

與囚金刃解脫

諸以金刃及他物可以自殺及解脫而與囚者杖一百
若囚以故逃亡及自傷傷人者徒一年自殺殺人者徒
二年若囚本犯流罪以上因得逃亡雖無傷殺亦準此

疏義曰金刃謂錐刀之屬他物謂繩鋸之類可以自
殺及解脫枷鎖雖囚之親屬及他人與者物雖未用
與者即杖一百若以得金刃等故因得逃亡或自傷
害或傷他人與物者徒一年若囚自殺或殺他人與
物者徒二年若囚本犯流罪以上因得金刃等物而
得逃亡者雖無殺傷與物者亦徒二年

即囚因逃亡未斷之間能自捕得及他人捕得若囚自
首及已死各減一等即子孫以可解脫之物與祖父母

父母部曲奴婢與主者罪亦同

疏義曰謂囚因得金刃及他物之故以自解脫而得逃走與物人罪未斷之間能自捕得及他人捕得若囚自來歸首及囚自死或他人殺之者亦同各減一等謂徒以下囚逃者一年徒上減流死囚逃者二年徒上減即子孫以可解脫之物謂稱孫者曾玄同而與祖父母父母或部曲奴婢與主者並與凡人罪同亦不合輒自捕捉若官司遣捕而送者無罪自捕送

官者同告法若有傷殺而逃亡者後能捕獲與物之人各依前傷殺之罪不合減科

死罪囚辭窮竟

問答一

諸死罪囚辭窮竟而囚之親故為囚所遣雇倩人殺之及殺之者各依本殺罪減二等囚若不遣雇倩及辭未窮竟而殺各以聞殺傷論至死者加役流

疏義曰謂犯死罪囚辭狀窮竟而囚之總麻以上親及故舊為囚所遣或雇人倩人而殺訖者其所遣雇

倩之人及受雇倩殺者各依尊卑貴賤本殺罪上減
二等科之囚若不遣親知雇倩人殺及囚雖遣雇倩
人殺而辭狀未窮竟而殺者其所遣之人及受雇倩
者各依尊卑貴賤以鬪殺罪論至死者加役流
問曰其囚本犯死罪辭未窮竟又不遣人雇倩殺之
而囚之親故雇倩人殺及殺之者合得何罪

答曰辭雖窮竟不遣雇倩人殺之雖遣雇倩殺之辭
未窮竟此等二事各依鬪殺為罪至死者加役流若

辭未窮竟復不遣雇倩殺之而輒殺者各同鬪殺之
法至死者並皆缺 不合加役流

辭雖窮竟而子孫於祖父母父母部曲奴婢於主者皆
以故殺罪論

疏義曰辭雖窮竟謂死罪辯定訖而子孫於祖父母
父母部曲奴婢於主雖被祖父母父母及主所遣而
輒殺者及雇人倩人殺者其子孫及部曲奴婢皆以
故殺罪論子孫仍入惡逆部曲奴婢經赦不原其被

卷二十一
雇倩之人仍同上解減闕殺罪二等

主守導令囚翻異

諸主守受囚財物導令翻異及與通傳言語有所增減者以枉法論十五足加役流三十足絞

疏義曰主守謂專當掌囚典獄之屬受囚財物導引其囚令翻異文辯及得官司若文證外人言語為報告通傳有所增減其罪者以枉法論依無祿枉法受財一尺杖九十一足加一等十五足加役流三十足

絞

贓輕及不受財者減故出入人罪一等無所增減者笞五十受財以受所監臨財物論其非主守而犯者各減主守一等

疏義曰贓輕謂受贓得罪輕於減囚罪一等者及不受財唯通言語減故出入罪一等謂導令翻異及通傳言語出入囚死罪者處流三千里出入流罪以下各減本罪一等之類雖即教導及通傳言語於囚罪

無所增減者笞五十若無增減而受財者以受所監
臨財物論一尺笞四十一足加一等八足徒一年其
非主守而犯者謂非監當囚人而有外人導囚翻異
有所增減各減主守罪一等若受贓財於主守贓上
減一等若不受財者於囚罪上減二等雖通言語無
所增減笞四十

囚給衣食醫藥

諸囚應請給衣食醫藥而不請給及應聽家人入視而

不聽應脫去枷鎖杻而不脫去者杖六十以故致死者徒一年即減竊囚食笞五十以故致死者絞

疏義曰準獄官令囚去家懸遠絕餉者官給衣糧家人至日依數徵納囚有疾病主司陳牒請給醫藥治療此等應合請給而主司不為請給及主司不即給準令病重聽家人入視而不聽及應脫去枷鎖杻而所司不為脫去者所由官司合杖六十以故致死者謂不為請及雖請不即為給衣糧醫藥病重不許家

人入視及不脫去枷鎖扭由此致死者所由官司徒
一年即減竊囚食者不限多少笞五十者由減竊囚
食其囚以故致死者減竊之人合絞

八議請減老小

問答

諸應議請減若年七十以上十五以下及廢疾者並不
合拷訊皆據衆證定罪違者以故失論若證不足告者
不反坐

疏義曰應議謂在名例八議人請謂應議者期以上

親及孫若官爵五品以上者減謂七品以上之官及五品以上之祖父母父母兄弟姊妹妻子孫者若年七十以上十五以下及廢疾依令一支廢腰脊折癰瘰癧儒等並不合拷訊皆據衆證定罪稱衆者三人以上明證其事始合定罪違者以故失論謂不合拷訊而故拷訊致罪有出入者即依下條故出入及失出入人罪法其罪雖無出入而枉拷者依前人不合捶拷法以聞殺傷論至死者加役流即以聞殺傷為

故失若證不滿三人告者不反坐被告之人亦不合入罪

問曰所告之事證有二人一人證是一人證非證既不足合科疑罪以否

答曰律云據衆證定罪稱衆者三人以上若證不足告者不反坐察驗難明二人證實猶故不合入罪况一實一虛被告之人全不合坐其於告者亦得免科若全無證人自須審察虛實以狀斷之若三人證實

二人證虛是名疑罪此解並據應議請減以下及廢疾以上除此色外自合拷取實情拷滿不服反拷告人不合從衆證科斷

其於律得相容隱即年八十以上十歲以下及篤疾皆不得令其為證違者減罪人罪三等

疏義曰其於律得相容隱謂同居若大功以上親及外祖父母外孫若孫之婦夫之兄弟及兄弟妻及部曲奴婢得為主隱其八十以上十歲以下及篤疾以

其不堪加刑故並不許為證若違律遣證減罪人罪三等謂遣證徒一年所司合杖八十之類

囚引人為徒侶

諸囚在案妄引人為徒侶者以誣告罪論即本犯雖死仍準流徒加杖及贖法

疏義曰囚在案妄引人為徒侶者謂盜發者妄引人為同盜殺人者妄引人為同行之類以誣告罪論謂依聞訟律誣告人者各反坐即本犯應死不可累加

故準流徒加杖法其應贖者即準流徒贖之

訊囚察辭理

諸應訊囚者必先以情審察辭理反覆叅驗猶未能決事須訊問者立案同判然後拷訊違者杖六十

疏義曰依獄官令察獄之官先備五聽又驗諸證信事狀疑似猶不肯實者然後拷掠故拷囚之義先察其情審其辭理反覆案狀叅驗是非猶未能決謂事不明辯未能斷決事須訊問者立案取見在長官同

判然後拷訊若充使推勘及無官同判者得自別拷
若不以情審察及反覆參驗而輒拷者合杖六十

若賊狀露驗理不可疑雖不承引即據狀斷之若事已

經赦雖須追究並不合拷

謂會赦移鄉及除免之類

疏義曰若賊狀露驗謂計賊者見獲真賊殺人者檢
得實狀賊狀明白理不可疑問雖不承聽據狀科斷
若事已經赦者雖須更有追究並不合拷註云謂會
赦移鄉及除免之類謂殺人會赦仍合移鄉犯十惡

故殺人反逆緣坐會赦猶除名監臨主守於監守犯
姦盜略人若受財而枉法會赦仍合免所居官稱之
類謂會赦免死猶流及盜詐枉法猶徵正賊故云之
類

拷囚不過三度

諸拷囚不得過三度數總不得過二百杖罪以下不得
過所犯之數拷滿不承取保放之

疏義曰依獄官令拷囚每訊相去二十日若拷未畢

更移他司仍須拷鞠卽通計前訊以充三度故此條
拷囚不得過三度杖數總不得二百杖罪以下謂本
犯杖罪以下笞十以上推問不承若欲須拷不得過
所犯笞杖之數謂本犯一百杖拷一百不承取保放
免之類若本犯雖徒一年應拷者亦得拷滿二百拷
滿不承取保放之

若拷過三度及杖外以他法拷掠者杖一百杖數過者
反坐所剩以故致死者徒二年

疏義曰拷過三度謂雖二百杖不得拷過三度及杖外以他法拷掠謂拷囚於法杖之外或以繩懸縛或用棒拷打但應行杖外悉為他法犯者合杖一百杖數過者反坐所剩謂囚本犯杖一百乃拷二百官司得一百剩罪之類以故致死者謂拷過三度或用他法及杖數有過而致死者徒二年

即有瘡病不待差而拷者亦杖一百若決杖笞者笞五十以故致死者徒一年半若依法拷決而邂逅致死者

勿論仍令長官等勘驗違者杖六十

拷決之失立案不立案等

疏義曰拷雖依法囚身有瘡若病不待差而拷者杖一百若決杖笞者笞五十若囚瘡病未差而拷及決杖笞致死者徒一年半若依法用杖依數拷決而囚邂逅致死者勿論邂逅謂不期致死而死詩云邂逅相遇言不期而遇仍長官以下並親自檢勘知無他故具為文案若長官等不即勘檢者杖六十註云拷決之失謂訊囚及決杖笞於法有失者立案不立案

等其有失者依職制律失者聽減三等

拷囚限滿不首

問答一

諸拷囚限滿而不首者反拷告人其被殺被盜及家人親屬告者不反拷

被水火損敗者亦同

拷滿不首取保並放違者

以故失論

疏義曰囚拷經三度杖數滿二百而不首反拷告人謂還準前人拷數反拷告人拷滿復不首取保釋放其被殺被盜之家若家人及親屬告者所訴盜殺之

人被拷滿不首者各不反拷告人以殺盜事重例多
隱匿反拷告者或不敢言若被人決水入家放火燒
宅之類家人及親屬告言者亦不反拷告人拷滿不
首取保並放違者以故失論違謂若應反拷而不反
拷及不應反拷而反拷者若故依故出入法失者依
失出入論其本法不合拷而拷者依前人不合捶拷
法亦以故失論其應取保放而不放者從不應禁而
禁不取保放者於律有違當不應得為流以上從重

徒罪以下從輕

問曰律云拷滿不首反拷告人其告人是應議請減人既不合反拷其事若為興奪

答曰律稱反拷告人明須準前人杖數反拷若前人被拷罪不首告者亦反拷若前人止拷一百不首告者亦反拷一百是名反拷告人其應議請減人不合反拷須準前人拷杖數徵銅

鞠獄停囚待對

欽定四庫全書

卷二十九

諸鞠獄官停囚待對問者雖職不相管皆聽直牒追攝
雖下司亦聽牒至不即遣者笞五十三日以上杖一百

疏義曰鞠獄官謂推鞠主司停囚待對問謂囚徒侶
見在他所須追對問者雖職不相管皆聽直牒稱直
牒者謂不緣所管上司直牒所管追攝註云雖下司
亦聽假如大理及州縣官須追省臺之人皆得直牒
追攝牒至皆須即遣不即遣者笞五十三日以上杖
一百

依告狀鞠獄

諸鞠獄者皆須依所告狀鞠之若於本狀之外別求他
罪者以故入人罪論

疏義曰鞠獄者推鞠之官皆須依所告本狀推之若
於本狀之外傍更推問別求得笞杖徒流及死罪者
同故入人罪之類若因其告狀或應掩捕搜檢因而
檢得別罪者亦得推之其監臨主司於所部告狀之
外知有別罪者即須舉牒別更糾論不得因前告狀

而輒推鞠若非監臨之官亦不得狀外別舉推勘

囚徒伴稽送併論

諸鞠獄官囚徒伴在他所者聽移送先繫處併論之

謂

從重若輕重等少從多多少等後從先若違者杖一百

禁處相去百里外者各從事發處斷之

疏義曰鞠獄官囚徒伴在他所者假有諸縣相去各百里內東縣先有繫囚西縣囚復事發其事相連應須對鞠聽移後發之囚送先繫之處併論之註云謂輕從重謂輕罪發雖在先仍移輕以就重若輕重等

少從多謂兩縣之囚罪名輕重等者少處發雖在先
仍移就多處若多少等即移後繫囚從先繫處若禁
囚之所相去百里外者各從事發處斷之既恐失脫
囚徒又慮漏泄情狀故令當處斷之違者各杖一百
若違法移囚即令當處受而推之申所管屬推劾若囚
至不受及受而不申者亦與移囚罪同

疏義曰違法移囚謂移重就輕或移多就少之類即
令當處受而推之謂囚至之處即合受推仍申所管

之州推劾謂兩縣囚申州兩州囚申省並依狀推劾
囚至不肯為受或受囚不申管屬與擅移囚罪同亦
杖二百即擅移囚縣各隸別州者即受囚之縣申所管
之州轉牒送囚之州依法推劾此等移囚並謂兩處
事發若是一處事發者不限遠近皆須直牒追攝如
有違者自從上法

決罰不如法

諸決罰不如法者笞三十以故致死徒一年即杖麤細

長短不依法者罪亦如之

疏義曰依獄官令決笞者腿臂分受決杖者背腿臂分受須數等拷訊者亦同笞以下願背腿分受者聽決罰不依此條是不如法合笞三十以此決罰不如法而致死者徒一年依令杖皆削去節目長三尺五寸訊囚杖大頭徑三分二釐小頭二分二釐常行杖大頭二分七釐小頭一分七釐笞杖大頭二分小頭一分五釐謂杖長短麤細不依令者笞三十以故致

死者徒一年故云亦如之

唐律疏義卷二十九

欽定四庫全書

唐律疏義卷三十

唐 長孫無忌等 撰

斷獄下

凡二十條

監臨以杖捶人

問答一

諸監臨之官因公事自以杖捶人致死及恐迫人致死
者各從過失殺人法若以大杖及手足毆擊折傷以上
減闕殺傷罪二等

疏義曰謂臨統案驗之官情不挾私因公事前人合杖笞自以杖捶人致死及恐迫人致死謂因公事欲求其情或恐喝或迫脅前人怕懼而自致死者各依過失殺人法各徵銅一百二十觔入死家若前人是卑賤罪不至死者各依本殺法徵銅若以大杖手足毆擊折傷以上者自擊使人擊等減闕殺傷罪二等謂其應償死者合徒三年之類

雖是監臨主司於法不合行罰及前人不合捶拷而捶

拷者以鬪殺傷論至死者加役流即用刃者各從鬪殺傷法

疏義曰雖是監臨主司於法不合行罰謂非判事之官及非專當督領者不得輒行捶罰假有人犯徒以上罪合送法司不送法司當曹即自行決罰之類及前人不合捶拷謂前人無罪或雖有罪應合官當收贖之類而輒捶拷者以鬪殺傷論謂傷與不傷並依他物鬪毆之法其因捶拷而致死者加役流用刃者

謂監臨之官自以杖捶人致死以下有用刃殺傷者
各依鬪訟律用刃殺者斬用兵刃殺者同故殺法
問曰里正坊正村正及主典因公事行罰前人致死
合得何罪

答曰里正坊正村正等唯掌追呼催督不合輒加笞
杖其有因公事相毆擊者理同凡鬪而科主典檢請
是司理非行罰之職因公事捶人者亦與里正等同
斷罪引律令

諸斷罪皆須具引律令格式正文違者笞三十若數事共條止引所犯罪者聽

疏義曰犯罪之人皆有條制斷獄之法須憑正文若不具引或致乖謬違而不具引者笞三十若數事共條謂依名例律二罪以上俱發以重者論即以賊致罪頻犯者並累科假有人雖犯二罪並不因賊而斷事官人止引二罪俱發以重者論不引以賊致罪之類者聽

應言上不言

諸斷罪應言上而不言上應待報而不待報輒自決斷者各減故失三等

疏義曰依獄官令杖罪以下縣決之徒以上縣斷定送州覆審訖徒罪反流應決杖笞若應贖者即決配徵贖其大理寺及京兆河南府斷徒及官人罪并後有雪減並申省省司覆審無失速即下知如有不當者隨事較正若大理寺及諸州斷流以上若除免官

當者皆連寫案狀申省大理寺及京兆河南府即封
案送若駕行幸即準諸州例案覆理盡申奏若不依
此令是應言上而不言上其有事申上合待報下而
不待報輒自決斷者各減故失三等謂故不申上故
不待報者於所斷之罪減三等若失不申上失不待
報者於職制律公事失上各又減三等即死罪不待
報輒自決者依下文流二千里

制勅斷罪

諸制勅斷罪臨時處分不為永格者不得引為後比若
輒引致罪有出入者以故失論

疏義曰事有時宜故人主權斷制勅量情處分不為
永格者不得引為後比若有輒引致罪有出入者以
故失論謂故引有出入各得下條故出入之罪其失
引者亦準下條失出入罪論

官司出入人罪

問答
一

諸官司入人罪者

謂故增減情狀足以動事者若聞知
有恩赦而故論決及示導令失實辭

之類

若入全罪以全罪論

雖入罪但本應收贖及加杖者止從收贖加杖之法

疏義曰官司入人罪者謂或虛立證據或妄構異端捨法用情鍛鍊成罪故註云謂故增減情狀足以動事者若聞知國家將有恩赦而故論決囚罪及示導教令而使詞狀乖異稱之類者或雖非恩赦而有格式改動或非示導而恐喝改詞情狀既多故云之類若入全罪謂前人本無負犯虛構成罪還以虛構枉入全罪科之

註雖入罪但本應收贖及加杖者止從收贖加杖之法

疏義曰假有入官蔭人及廢疾流罪前人合贖入者亦以贖論或入官戶部曲奴婢并單丁之人前人合加杖者亦依加杖之法收贖不用官當及配流役身之例此是官司入人罪與誣告之法不同

從輕入重以所剩論刑名易者從笞入杖從徒入流亦

以所剩論

三流同比徒一年為剩即從近同比徒半年為剩若入加後流者各計加後流者各計加

役年
為剩 從笞杖入徒流從徒流入死罪亦以全罪論其出

罪者各如之

疏義曰從輕入重以所剩論假有從笞十入三十即
剩入笞二十從徒一年入一年半即剩入半年徒所
入官司各得笞二十及半年徒之類刑名易者從笞
入杖亦得所剩之罪從徒入流者註云三流同比徒
一年為剩謂從徒三年入流二千里或二千五百里
或流三千里遠近雖異俱曰流刑至於配所役身三

流同有一年居作故從徒入流三流同比徒一年為
剩即從近流二千里入至二千五百里或入至三千
里者同比徒半年為剩若從三流入至加役流者各
計加役年為剩但入加役流者加常流役二年將加
役二年以為剩罪從笞杖入徒流從徒流入死罪假
有從百杖入徒一年即是全入一年徒坐從徒流入
死罪謂從一年徒以上至三千里流而入死刑者亦
依全入死罪之法故云亦以全罪論其出罪者謂增

減情狀之徒足以動事之類或從重出輕依所減之
罪科斷從死出至徒流從徒流出至笞杖各同出全
罪之法故云出罪者各如之假有囚犯一年徒坐官
司故入至加役流即從一年至三年是剩入二年徒
罪從徒三年入至三流即三流同比徒一年為剩加
役流復剩二年即是剩五年徒坐官司從加役流出
至徒一年亦準此

即斷罪失於入者各減三等失於出者各減五等若未

決放及放而還獲若因自死各聽減一等

疏義曰即斷罪失於入者上文故入者各以全罪論
失於入者各減三等假有從笞失入百杖於所剩罪
上減三等若入至徒一年即同入全罪之法於徒上
減三等合杖八十之類失於出者各減五等假有失
出死罪者減五等合徒一年半失出加役流亦準此
三流同為一減減五等合徒一年之類若未決放者
謂故入及失入死罪及杖罪未決其故出及失出死

罪以下未放及已放而更獲若因自死但使囚死不問死由各聽減一等謂於故出入及失出入上各聽減一等

即別使推事通狀失情者各又減二等所司已承誤斷訖即從失出入法雖有出入於決罰不異者勿論

疏義曰別使推事謂充使別推覆者通狀失情謂不得本情或出或入各又減二等失入者於失入減三等上又減二等若失出者於失出減五等上又減二

等所司已承誤斷訖謂曹司承誤通之狀已依斷訖
即從失出入法謂皆從在曹司出入法科之並同減
五等三等之例若未決放及放而還獲若囚自死各
聽減一等其所司承誤已斷訖者曹司同餘官案省
不覺法雖有出入於決罰不異假有官戶部曲官私
奴婢本犯合徒三年斷入流罪或從三流之法科徒
三年各止加杖二百刑名雖有出入加杖數即不殊
者無罪故云於決罰不異者勿論

問曰有人本犯加役流出為一年徒坐放而還獲減一等合得何罪

答曰全出加役流官司合得全罪放而還獲減一等合徒五年今從加役流出為一年徒坐計有五年剩罪放而還獲減一等若依徒法減一等仍合四年半徒既是剩罪不可重於全出之坐舉重明輕止合三年徒罪

赦前斷罪不當

諸赦前斷罪不當者若處輕為重宜改從輕處重為輕
即依輕法

疏義曰處斷刑名或有出入不當本罪其事又在恩
前恐判官執非不移故明從輕坐之法若處輕為重
宜改從輕假有鬪殺堂兄當時作親兄斷為惡逆會
赦之後改從堂兄坐當不睦赦若十惡亦原處流二
千里以常赦不免故仍處流坐又如鬪殺凡人斷為
殺總麻尊長會赦十惡不免改為雜犯免死移鄉此

並仍有輕罪又有受所監臨五十疋斷為枉法處死
會赦改為受所監臨不在徵贓之例又有犯近流科
作遠流或止合一官當徒斷用二官以上若奏畫訖
及流至配所會赦者改從本犯近流及還所枉告身
若未奏畫及流人未到流所會赦者即從赦原若應
徵銅而處輕為重其銅或在限外未輸或在限內納
訖會赦者並改從輕法其剩納者却還未送者依輕
罪數徵納若限內未納會赦者從赦並免稱輕者全

免亦是故令云犯罪未斷決逢格改者格重聽依犯
時格輕聽從輕法即總全無罪亦名輕法其處重為
輕即依輕法假令犯十惡非常赦所不免者當時斷
為輕罪及全放並依赦前斷定

其常赦所不免者依常律

常赦所不免者謂雖會赦猶處死及流若除名免所居官

及移鄉者

疏義曰常赦所不免者赦書云罪無輕重皆赦除之
不言常赦所不免者亦不在免限故云依常律即犯

惡逆仍處死反逆及殺從父兄姊小功尊屬造畜蠱毒仍流十惡故殺人反逆緣坐獄成者猶除名監守內姦盜略人受財枉法獄成會赦免所居官殺人應死會赦移鄉等是

即赦書定罪名合從輕者又不得引律比附入重違者各以故失論

疏義曰赦書定罪名合從輕者假如貞觀九年二月十六日赦大辟罪以下並免其常赦所不免十惡妖

言惑衆謀叛已上道等並不在赦例據赦十惡之罪赦書不免謀叛即當十惡未上道者赦特從原叛罪雖重赦書定罪名合從輕不得引律科斷若比附入重違者以故失論

聞知恩赦故犯

諸聞知有恩赦而故犯及犯惡逆若部曲奴婢毆及謀殺若強姦主者皆不得以赦原即殺小功尊屬從父兄姊及謀反大逆者身雖會赦猶流二千里

疏義曰聞知有恩赦而故犯謂赦書未出私自聞知而故犯罪者及犯惡逆謂毆及謀殺祖父母父母殺伯叔父母姑兄姪外祖父母夫之祖父母父母此名惡逆若部曲客女亦同并奴婢毆及謀殺若強姦主者皆不得以赦原即殺小功尊屬從父兄姪及謀反大逆者此等雖會赦免死猶流二千里

獄結竟取服辯

諸獄結竟徒以上各呼囚及其家屬具告罪名仍取囚

服辯若不服者聽其自理更為審詳違者笞五十死罪杖一百

疏義曰獄結竟為徒以上刑名長官同斷案已判訖徒流及死罪各呼囚及其家属具告所斷之罪名仍取囚服辯其家人親屬唯止告示罪名不須問其服否囚若不服聽其自理依不服之收更為審詳若不告家属罪名或不取囚服辯及不為審詳流徒罪並笞五十死罪杖一百

緣坐沒官放之

諸緣坐應沒官而放之及非應沒官而沒之者各以流罪故失論

疏義曰賊盜律謀反及大逆人子年十五以下及母女妻妾子妻妾亦同若祖孫兄弟姊妹並沒官男夫年八十及篤疾婦人男六十及廢疾並免出養入道及娉妻未成者並不追坐若應沒而放應放而沒各依流罪以故失論謂反逆緣坐流三千里沒官罪重

須用三千里流法若故同故出入三千里流若失同
失出入三千里流稱放者應沒遣流與全放無別應
流遣沒得罪亦同

徒流送配稽留

諸徒流應送配所而稽留不送者一日笞三十三日加
一等過杖一百十日加一等罪止徒二年

不得過罪人之罪

疏義曰徒流應送配所謂徒罪斷訖即應役身準獄
官令犯徒應配居作在京送將作監在外州者供當

處官獄案成即送而稽留不送其流人準令季別一遣若符在季末三十日內至者聽與後季人同遣違而不送者一日笞三十三日加一等過杖一百十日加一等五十二日罪止徒二年註云不得過罪人之罪謂罪人應徒一年者稽留官司亦罪止徒一年之類

輸備贖沒入物

諸應輸備贖沒入之物及欠負應徵違限不送者一日

笞十五日加一等罪止杖一百若除免官當應追告身
違限不送者亦如之

疏義曰應輸備贖沒入之物備謂亡失官私器物各
備償贖謂犯法之人應徵銅贖沒謂彼此俱罪之贓及
犯禁之物沒官入者謂得闡遺之物限滿無人識認
者入官及應入私之類又依獄官令贖死刑八十日
流六十日徒五十日杖四十日笞三十日若應徵官
物者準直五十足以上一百日三十足以上五十日

二十足以上三十日不滿二十足以下二十日其失
有欠負應徵違限不送者並準令文依限送納違者
一日笞十五日加一等罪止杖一百若除免官當謂
犯罪斷除名免官免所居官及官當應追告身不送
者亦一日笞十五日加一等罪止杖一百

婦人懷孕犯死罪

諸婦人犯死罪懷孕當決者聽產後一百日乃行刑若
未產而決者徒二年產訖限未滿而決者徒一年失者

各減二等其過限不決者依奏報不決法

疏義曰婦人犯死罪懷孕當應行決者聽產後一百日乃行刑若未產而決者徒二年產訖未滿百日而決者徒一年失者各減二等未產而決徒一年產訖限未滿而決者杖九十即過限不決者依奏報不決法謂依下條即過限不決者違一日杖一百二日加一等

拷決孕婦

諸婦人懷孕犯罪應拷及決杖笞若未產而拷決者杖一百傷重者依前人不合捶拷法產後未滿百日而拷決者減一等失者各減二等

疏義曰婦人懷孕犯罪應拷及決杖笞皆待產後一百日然後拷決若未產而拷及決杖笞者杖一百傷重者謂傷損之罪重於杖一百者依前人不合捶拷法謂依上條監臨之官前人不合捶拷而捶拷者以聞殺傷論若墮胎者合徒二年婦人因而致死者加

後流限未滿而拷決者減一等謂減未產拷決之罪
一等失者各減二等謂未產而失拷決於杖一百上
減二等傷重於鬪傷上減二等若產後限未滿而拷
決者於杖九十上減二等傷重者於鬪傷上減三等
立春後不決死刑

諸立春以後秋分以前決死刑者徒一年其所犯雖不
待時若於斷屠月及禁殺日而決者各杖六十待時而
違者加二等

疏義曰依獄官令從立春至秋分不得奏決死刑違者徒一年若犯惡逆以上及奴婢部曲殺主者不拘此令其大祭祀及致齋朔望上下弦二十四氣雨未晴夜未明斷屠月日及假日並不得奏決死刑其所犯雖不待時若於斷屠月謂正月五月九月及禁殺日謂每月十直日月一日八日十四日十五日十八日二十三日二十四日二十八日二十九日三十日雖不待時於此月日亦不得決死刑違而決者各杖

欽定四庫全書

唐律疏義
卷三十

六十待時而違者謂秋分以前立春以後正月五月
九月及十直日不得行刑故違時日者加二等合杖
八十其正月五月九月有閏者令文但云正月五月
九月斷屠即有閏者各同正月亦不得奏決死刑

死囚覆奏報決

諸死罪囚不待覆奏報下而決者流二千里即奏報應
決者聽三日乃行刑若限未滿而行刑者徒一年即過
限違一日杖一百二日加一等

疏義曰死罪囚謂奏畫已訖應行刑者皆三覆奏訖
然始下決若不待覆奏報下而輒行決者流二千里
即奏報應決者謂奏訖報下應行決者聽三日乃行
刑稱日者以百刻須以符到三日乃行刑若限未滿
三日而行刑者徒一年即過限違一日杖一百二日
加一等在外既無漏刻但取日周晷時為限

斷罪決配而收贖

諸斷罪應決配之而聽收贖而決配之若應官當而不

以官當及不應官當而以官當者各依本罪減故失一

等

死罪
不減

疏義曰斷罪應決配之謂無官蔭及非老小及疾之色犯笞杖應決徒流應配官司乃收贖應收贖謂有官蔭及廢疾若年七十以上十五以下本罪合贖而決配之若應官當謂流內九品以上犯徒以上罪合以官當官司乃不以官當或不應官當謂罪輕不盡其官及過失犯罪不合用官當徒而官司乃以官當

者各依本犯當贖及決配之罪減故失一等註云死罪不減若應死而聽當贖應收贖而其決死刑不在減例各從出入死罪故失科之

即品官任流外及雜任於本司及監臨犯杖罪以下依決罰例

疏義曰品官任流外及雜任謂身帶勲官散官而任流外及雜任者於本司及監臨謂於本司及臨時監統者若犯杖罪以下依流外雜任之例決杖不准官

品徵贖若徒罪以上自依當贖法其有准蔭應贖者
任流外及雜任若犯杖罪以下亦準品官依決罰例
斷罪應絞而斬

諸斷罪應絞而斬應斬而絞徒一年自盡亦如之失者
減二等即絞訖別加害者杖一百

疏義曰犯罪應絞而斬應斬而絞徒一年以其刑名
改易故科其罪自盡亦如之依獄官令五品以上犯
非惡逆以上聽自盡於家若應自盡而絞斬應絞斬

而令自盡亦各徒一年故云亦如之失者減二等謂
原情非故者合杖九十即絞訖別加害者謂絞已致
斃別加拉幹折腰之類者杖一百

領徒囚應役不役

諸領徒應役而不役及徒囚病愈不計日令陪役者過
三日笞三十三日加一等過杖一百十日加一等罪止
徒二年

不得過罪人之罪

疏義曰領徒應役謂掌領囚徒令役身者而不役及

徒囚因病給假病愈合役不令陪役者過三日笞三十
十三日加一等過二十四日合杖一百過杖一百十
日加一等罪止徒二年註云不得過罪人之罪謂如
應徒一年者雖多日不役亦不得過徒一年其二年
以下並準此囚數多者從不役人日缺者為罪

縱死囚逃亡

諸縱死罪囚令其逃亡後還捕得及囚已身死若自首
應減死罪者其獲囚及死首之處即須遣使速報應減

之所有驛處發驛報之若稽留使不得減者以入人罪
故失論減一等

疏義曰謂囚合死在禁所司縱令逃亡依故縱之條
還合死罪捕得及囚已死若自首應減死罪者謂依
捕亡律及上條放而還獲得減一等者其獲囚之處
及死首之所即須遣使速報應減死之處若有驛之
處發驛報之若使人及官司稽留令不得減罪致使
囚已決訖者以入人罪故失論減一等謂故稽遲從

故入上減死一等流三千里若失稽遲從失入罪上
減一等總減罪人四等徒二年官司及使人各以所
由為坐

疑罪

諸疑罪各依所犯以贖論

疑謂虛實之證等是非之理均或事涉疑似傍無證見或

傍有闕證事非疑似之類


即疑獄法官執見不同者得為異議議不

得過三

疏義曰疑罪謂事有疑似處斷難明各依所犯以贖

論謂依所疑之罪用贖法收贖註云疑謂虛實之證
等謂八品以下及庶人一人證虛一人證實二人以
上虛實之證其數各等或七品以上各據衆証定罪
亦各虛實之數等是非之理均謂有是處亦有非處
其理各均或事涉疑似謂賊狀涉於疑似傍無證見
之人或傍有聞見之人其事全非疑似稱之類者或
行迹是狀驗非或聞證同情理異疑狀既廣不可備
論故云之類即疑獄謂獄有所疑法官執見不同議

律論情各申異見得為異議聽作異同議不得過三
謂如丞相以下通判者五人大理卿以下五人如此
同判者多不可各為異議故云議不得過三



唐律疏義卷三十